

粟

香

三

筆

栗香三筆卷五

江陰 金武祥 遊生

吾鄉楊文定公名時與余 高祖敬齋先生爲理學
交 先曾祖守一齋筆記中載其孝行及軼事一則
文定在詞館中蕭然如寒士一日

聖主問李文貞朝臣操守有如張鵬翮趙申喬者乎
以公對遂命提學直隸直隸學政以檢討任前後所
罕有也遷侍講丁艱服滿自河工還朝未補官有

旨典陝試亦出特恩以雲貴總督兼雲撫時於奏
牘中言存誠主敬之學

世宗手批答之云吾君臣萬里談道不亦樂乎嗚呼
理學名臣如公者當從祀兩廡而無忝矣

楊文定公墓有

御賜碑文云國家隆盛之際必有哲碩之臣學足以
鼓吹休明道足以楷模多士由是生協圭璋之望歿
膺綸綺之榮蓋以褒崇往哲風示來茲厥典茂焉爾

原任禮部尚書兼管國子監祭酒事楊名時性秉
恪誠學歸純正文章根於經籍理學本乎儒先典畿
甸之銓衡士風丕振樹滇南之節鍼民俗還醞朕當
續繙之初特召老成之彥命官宗伯兼作司成夙夜
著其寅清生徒式其訓迪瀛洲課士允資大雅之儀
型禁地傳經實藉純儒之講論胡然黃髮遽返青冥
用崇褒贈之文以盡飾終之禮加爾爲太子太傅謚
曰文定嗚呼松楸在望堪嗟馬鬣之封琬玉初鐫永

荷龍章之錫垂之奕世式是豐碑

文定公集卷帙頗多存詩極少有讀朱子文集詩云
儒學尊朱子遺書永不刊心源傳孔孟詞藻軼歐韓
研討微言契披尋奧義殫欣逢 文治盛海宇快同
觀呈安溪李夫子詩云六籍撥塵翳百家匯爲一又
云浩然沛九垓卷之藏於密又云抗志懷前哲努力
崇大雅卽其詞章亦見理學之大凡矣

高祖敬齋先生別號霞江著有丹鉛雜錄述聞錄諸

書多言性理及經史之學經燹不存表弟繆幼丞孝廉出示其曾祖申浦太史手抄本中有金霞江先生詩四首爰謹錄之壬戌送房師阮裴園先生

學浩 視

學楚南云洞庭波浪接天浮銜 命乘艷人楚游冰鏡應隨江浦月絳帷恰趁木蘭舟雲霞掩映新花笑汀渚蒼茫舊雨愁不盡離懷轉無語湘波燕水共悠悠七年書劍侍師門媿負孫陽知己恩賦獻 螭均迷玉局文投蟾窟誤金根可堪失水羈愁迫猶喜吟

風笑語溫今日旗亭惆悵別綈函枕秘向誰論却爲
齎鹽身繫留難隨星使度芳洲從游士盡花爲幕載
酒時當月滿樓屈宋風騷揚楚郡陳徐最績報 皇
州他年內擢爲霖雨還潤焦桐爨下不咏夾竹桃云
弱幹蕭蕭幾葉斜嫣紅冉冉映窗紗誰移簣谷嬋娟
影幻作天台爛漫花只向秋籬消寂寞不隨春色鬪
繁華休言看竹無須主愛客偏烹日注茶

乾隆三十五年

皇太后八旬萬壽凡六十以上齊眉命婦均得邀綵
綵珍品之 賜漢臣中同時受

賞者吏部尙書程景伊妻金氏禮部尙書蔡新妻何
氏吏部侍郎曹秀先妻劉氏三人閥閱閨闥傳爲榮
遇按程文恭公夫人爲余高祖姑幼時有異徵知其
必貴載 先曾祖守一齋筆記中

守一齋筆記多載戚黨軼事有一則云余表兄繆申
浦名晉二姑母長子也資性少鈍夏楚綦嚴先君謂

姑母曰吾甥器宇不凡飛騰在卽無欲速未幾姑母
卒申浦甲申鄉試入場之夕夢姑母告之曰汝試事
吾料理妥當好爲之是科獲雋乙未會試夢如前成
進士入館選後擢侍講

又記孫節母一則云堂姊丈孫名勲號書屏乾隆丙
子舉人其母許太恭人年十九守節撫孤有夢城隍
神迎迓放偷兒竊五百金一事歲癸酉太恭人夢墮
星如雷神人抱送太恭人房太恭人抱送余姊房數

日姊分娩得子遂名星衍字淵如丙辰四月余赴山
左晤書屏喬梓並謁太恭人年八十有九而神采如
六十許云按 先曾祖詩云吾家阿士星辰降卽指
淵如先生也

從伯曙洲先生舉行誼略載二筆陸祠生先生 繼輶

有寒夜獨飲有懷詩云江北儒官甲天下周 伯恬 金

曙洲

沈小宛 宋于庭

皆絕倫鴻詞大科久不舉駿雄
之士安長貧寒雲壓簷雪欲下濁酒引醉裘差溫何

當呼取共歲暮使我破屋迴陽春是時江蘇安徽學
官尙未分省署洲先生在建德祁生先生在合肥皆
爲學官云

崇百藥齋五哀詩哀廣州通判屠君紳云心期鬱鬱
向誰陳論定斯人我最真遊戲文章都奧衍猖狂意
氣是酸辛憐才熱淚傾如水垂老柔鄉葬此身却悔
臨歧殊草草危言含意未全伸卽詠吾鄉笏巖刺史
也其所著六合內外瑣言初名瑣蛷雜記吳穀人先

生有序以吳錫麒爲姪金麟其詭異如此

六合內外瑣言及蟬史二種縣志皆不載僅載其酌酒與儲玉琴詩一首云當筵那後問悲歡念爾茫茫感百端風雨十年家鐵甕雲山一夕話銅官誰憐冷鋸稽康竈我愧虛彈貢禹冠今夜蓉城好明月醉中猶得坐團圞余見亦有生齋集有屠賢書詩序稱其曠朗出塵時得神解惜無由見其全集也

賢書刺史居西貫在余居大岸之北里許在大岸之

東者爲篁村其同時有陳湖海明經瑛亦以詩名有
湖海詩鈔六卷同屠賢書夜坐云四野浩風露迥然
長道心溪澄收眾籟月澹出疎林觀化形同釋忘機
暑不侵清言餘逸韻如聽潁師琴詩境多似王孟農
家云農家敦樸風但解數雞豕袒褐被我躬不必紈
與綺糲食充我腹不必甘與旨榆莢春雨滋穠稭秋
風起宜麥亦宜稻高廩登億秭水旱占蛙聲五行陋
志史中古書契垂頗爲作僞始椎魯耕鑿民渾沌實

未死賽社歡粉榆爭春賤桃李負薪而行歌翁子吾
所鄙咏竹云相對坐深林清言已忘暑添作一庭涼
颯然過新雨

由篁村而東二里許爲匯上許氏世居之與陳明經
同時唱和者爲許桐山居士煥有小湖詩鈔二卷明
經序之其咏鄉居長堤春柳云青青小橋西湖邊值
春曙殘月一堤烟鶯聲不知處斷岸秋蘆云秋風吹
處老雁叫蘆花早寒烟淺水中漁舟去來好摘句田

家雜咏云豈不樂游戲衣食謀吾生又云念此子孫
賢方知祖父力又云夕陰動涼色蟬響催落暉過閣
黎庵云地閒多草色寺古剩松陰懷麗南云故人清
似月秋夢亂於雲李申耆太史序以爲天機清逸不
事雕藻信然

幼丞書來云先曾祖申浦公著有岸舫齋詩鈔官翰
林時卜居汪文端公故宅時晴齋有和趙雲松前輩
舊題時晴齋詩一時和者甚眾詩云僦得城南屋數

極規模爽垲舊聞名子山園小留全面宋玉居寬未
合併分兩家
賃居客至有花乘有竹窗開宜雨更宜晴綠

陰滿院紅曦少秀色清光著意迎曲曲疏籬短短欄

藤花開作紫雲觀山形宛委窺非易石勢嶙峋繪亦

難竹塢蕉亭容憩息高梧文杏歷暄寒洞天引得微

泉出有冽泡波古井瀾

幼丞又云先祖滋雲公諱庭桂道光乙酉拔貢官四

川巴州牧著有震无咎齋詩鈔八卷五言如晚烟吞

水白夕照背山紅雲推山似海霧擁屋無門斷橋流
水截危棲夕陽登七言如放晴山色推篷送入夜灘
聲到枕催久宦歸家翻似客窮途度臘不成年一邑
敢云棲枳棘十年誰爲辨薰蕕三度五千餘里路半
生四十九年非歸與兒偕聊減從行如女嫁每愆期
皆可誦也

薑露庵雜記云窮經難得古人之意蓋宋學多望文
生義攬以己意講漢學者又或誇多鬪靡失之穿鑿

蔣子雅曰江陰鳳德隆注三禮毘陵王瑤舟注易吳晉望注詩則不分漢宋不附傳注亦不獨出己見其法以經注經講義理出乎人心之所安講典制則三面參考以折中於一是曰三隅對求法自來注家無出其右云云余聞鳳先生三禮注未經付梓王吳兩書雖爲鋟木未盛行而板已燬于兵燹矣武祥按鳳先生三禮注及四書補考均未見而讀書瑣記刻藝海珠塵中鳳氏經說刻粵雅堂叢書中王先生學易

五種十四卷已付梓亂後未見吳先生詩經申義十
卷前歲始得于粵中書肆云

江陰縣志云鳳應韶字德隆歲貢生幼孤貧織竹爲業嘗隔簾聽童子讀書聲卽能背誦塾師異之授以書攻苦不輟比入邑庠博覽強記三禮注疏熟誦如流說經具有心得所注鳳氏經說讀書瑣記四書補考先後梓行復有五經辨證儀禮鈎提左傳杜注參事等書藏于家余按鳳先生家丁墅距余家十餘里

亂後其族姓寥落所藏之書蓋不可復得矣

吾郡經學家莊氏爲盛劉申受先生逢祿莊氏甥也
盡傳其學尤精春秋公羊家言嘉慶十九年由庶吉
士改禮部主事道光四年河南學使請以尙書湯文
正從祀文廟議者以文正康熙中輔導理密親王獲
譖乾隆中嘗奉駁難之先生攬筆書曰后夔典樂猶
有朱均呂望陳書難匡管蔡尙書汪文端善而用之
遂奉 俞旨是年越南貢使陳請爲其國王母乞人

薦得 旨賞給而 諭中有外夷貢道之語其使臣
欲請改爲外藩部中以 詔書難更易先生草牒復
之曰周官職方王畿之外分九服夷服去王國七千
里藩服九千里是藩遠而夷近說文羌夷蠻貊字皆
從物旁惟夷從大從弓者東方大人之國夷俗仁仁
者壽有東方不死之國故孔子欲居之且乾隆間奉
上諭申飭四庫館不得改書籍中夷字作彝裔字
舜東夷之人文王西夷之人我 朝六合一家盡去

漢唐以來拘忌嫌疑之陋使者無得以此爲疑越使
遂無辭而退先生在禮部十二年以經義決疑事類
如此

常州劉氏康雍時文恪公於義爲最著其大分四房
稱張劉文定公綸其裔也先自大同徙鳳陽明洪武
初有劉眞者從兵徇江南防守常州遂家焉後五世
璠無子以姊適張氏之子峩爲子峩有隱德嘗受寓
遠商數千金十餘年不至後遇匱者訝其貌詰之果

其子云父客死久矣泣而歸之憾識如故云

錢黃山茂才季重嘗自貌女裝題曰春風鬢影圖左
仲甫中丞爲題疏影詞云春寒風靡有美人斂袂日
暮孤倚憶昔相逢華彩如英風流自厭羅綺年來雙
鬟吹難綠料金屋安排無意拚此身化做巫雲搖蕩
楚江烟水 或者湘纍未死慕他善窈窕與採芳芷
嫋嫋秋風江上愁余又恐呼之不起歸來依舊尋花
住問雙燕可來花底有阿誰未昧平生並入女蘿烟

裏中丞名輔有念宛齋詞

念宛齋詞僅於宛陵詞選見二首近見有人抄錄十
餘首茲錄其疏影詠珠藤云纔傷絮落又水邊籬角
撩亂心曲宿雨初收斜日低銜平添一界新綠珠簾
不捲留春夢怕飛出歲蕤深閣儘濃雲壓住鬟釵那
管粉痕銷肉應念鸞箋未寄曉來斂翠黛珠淚盈
斛知否年時紫玉成烟牋有燕飛華屋傷心一樣相
思種不及豆紅堪掬只模糊眼底眉梢挂垂垂千絡

垂楊詠秋柳云華年易老看碧柳依依得秋何早春
水樓臺也會好夢勾留到芙蓉泣露臨清曉盼不着
一絲顫裏牕空條帶箇歸雅襯些兒衰草況是離
愁難了趁古堠殘霜亂山斜照那不消魂者般憔悴
原知道相看漫訝烟痕少是鏡裏春人畫稿可能風
信吹回依舊好

陽湖趙鶴皋茂才鏞謨與方元徵徵君交好年二十
三而卒遺有舒懷草數十首自君之出矣云自君之

出矣不復捲珠簾愁意如新月寒輝夜夜添閨怨云
簾外舞楊花東風雙燕斜無言人寂寂情思到天涯
其他斷句云酒同愁角力詩爲我傳神波印遙峰疑
倒插舟行遠岸似相迎頗新

武陽縣志載董元愷舜民有蒼梧詞十二卷已佚近
方子可國簿藏有抄本僅存數十首小令爲多有王
阮亭顧黃公諸先生評語南歌子別況云淚落吹成
絮愁多亂似絲偎人剛道莫相思却是相思此夜起

頭時搗練子和內寄原韻云愁脉脉水盈盈握手臨
歧無限情搵着啼痕雙袖淚笑從花裡送郎行如夢
令閨情和李易安韻云忽地披衣起坐夢也分明真
箇夢也更淒涼生怕夢來難躲無那無那守着影兒
伴我生查子閨怨云送郎上車輪車遠郎亦遠願作
車後塵處處隨郎轉郎行轍不歸妾淚不離眼看
取眼淚痕與轍誰深淺醉花間卽事云休相近還相
近相近低聲問昨夜夢中人暗送橫波影認情多

不諱癡愛極翻成恨來朝怕別離又把啼痕搘點絳
唇春歸云杜宇年年聲聲只喚春歸去春歸何處且
把簾垂住 簾捲東風春竟穿簾去留難住放春歸
去來歲春來處春去也春愁云春來風雨儂愁做送
得春歸却是愁來路愁來原是共春來春歸不帶愁
同去 愁欲留春少住春竟拋愁獨去何如索性不
逢春一年長在愁邊住

董舜民蒼梧詞有烏江懷古念奴嬌用東坡赤壁韻

云長天浩渺看年年如此江山風物奪却會稽頭與
印已定江東半壁九郡稱雄五侯臣服一劍飛寒雪
入關以後東歸詎是人傑 賴有駿馬悲號美人宛
轉叱咤英風發試問漢家今孰主都向暮烟沈滅百
戰難亡千金可購遺恨衝冠髮陰陵道上亂鴉叫醒
殘月

二卷所錄文信國公念奴嬌詞乃其友人驛中言別
作誤爲信國詞信國有和作云乾坤能大莫蛟龍原

不是池中物風雨牢愁無著處那更寒蛩四壁橫槊題詩登樓作賦萬事空中雪江流如此方來還有英傑堪笑一葉飄零重來淮水正涼風新發鏡裏朱顏都變盡只有丹心難滅去去龍沙向江山回首青山如髮故人應念杜鵑枝上殘月

信國公又有南康軍和東坡念奴嬌韻云廬山依舊淒涼處無限江南風物空翠晴嵐浮汗漫還障天東半壁雁過孤峯猿歸老嶂風急波翻雪乾坤未歇地

靈尙有人傑 堪嗟飄泊孤舟河傾斗落客夢催明
發南浦間雲連草樹回首旌旗明滅三十年來十年
一過空有星星髮夜深愁聽胡笳吹徹寒月

龔芝麓尙書定山堂詩餘四卷有念奴嬌用東坡赤
壁韻題云花下小飲時方上書有所論列八月廿五
日也詞云畫眉餘興哂王章閨閣都無英物北闕浮
雲遮望眼誰作中流鐵壁剪豹天關搏鯨地軸隻字
飛霜雪焚膏相助壯哉兒女人傑 投袂太息花前

仰天長笑正酒狂初發赤日金鱗霄漢轉生見嶽搖
氣滅一葉身輕千峯約在幸少星星髮與君沈醉玉
臺斜過佳月

上海申報刊漢壽易實甫順鼎吳興沈伯華沈赤壁
聯句念奴嬌詞用東坡原韻云一拳石耳實甫羨當

日曾見江東人物霸氣難平伯華風起處陡立驚濤

如壁折戟沙埋實甫焚舟燼冷日色寒於雪幾回吟

嘯伯華老仙文筆奇傑實甫今日吾輩扁舟伯華

伴飛鷗數點

實甫

艤聲初發短堞高樓

伯華

烟影外

惟見青山明滅莫更憑欄

實甫

江天來弔古雄心衝

髮斜陽殘角

伯華

淡紅吹出明月

實甫

易沈二君復有憶西湖舊游聯句孤山云客來先問

鶴

伯華

人去但留花

實甫

蘇白隱云人如垂柳瘦

甫橋比畫船低

伯華

冷泉亭云煎茶詩夢熟

伯華

踏

葉屐聲圓

實甫

西溪云人家花氣裏

實甫

村落水光

涵

伯華

又刻碧湘秋夢詞人吳船草數十首皆實甫

近作也

洪北江與孫季遠書云昨已冬始寒尤逼人狂風一
來吹卷出戶稍遲未覓已過牆外南鄰朽桑蟲厚逾
寸敗葉旣盡時來啞人車聲過巷床几皆動土旣不
實條陷窟穴離離黃蒿乃長屋角閒塵積畝反不生
草地幸稍遠掩戶避客偶出酬接皆至失歡樂蓮裳
白雲寺讀書記云松枝掃梁梅根挂榻承瀑滑研映
旭陳書晨覲新函夕披故帙課有定程製靡恆體餘

力弗等任意所臻佳月曠窗輒思吐句過雲拂席忽
擬臨書橫筵孤吹初不相和文楸對弈聊以節談風
無停聲雨多遠勢旣答吟吻亦浹靈襟又云荒寂之
境幽致爲多蟲蘿黏壁甃破而飛雀食墮階蟻逢而
運纖形瑣趣閒領故深蔡爾眉括蒼郡齋與婦書云
寓齋苦隘又已就荒三徑皆緣蒿生已叢一絲掛簷
蛛抱而墮闌干朽而莫倚窗臼壞而未脫支板作几
藉藁代牀隨車之書仍弄於篋略一陳設几席皆滿

風來振之輒汚墨瀋舉袖欲拭復覆茶具以故行文
但條其所憶引古罷稽其所自意緒乖錯無可告訴
以上三文余里居讀書及客游寓齋往往有此景象
因類錄之

德清蔡爾眉明經壽昌有蛻石文鈔余僅於友人鈔
本中見其與婦書二篇括蒼其第二書也其初至景
甯與婦書云君無恙山川千里風雨一心願言之懷
想同之也別後抵杭旋適舊館登樓況瘁負米告勞

地是吾鄉情同客路斯已極岑寂之孤趣矣抑旣作
依人之計猶復唱行路之難五月之朔遽去鴉峯柔
膚孤曳起人遠懷矮鐙一星搖我夢影如是九日舍
舟載途爰喚筍輿越桃花嶺丹厓附天蒼壁截漢林
木脩蔽峯巒窈深萬緣相亞日午猶暝一白同色雲
流有光林颺忽吹山雨遽至炊烟合汎嵐氣莽蒼泉
從石飛天將峯壓拾樵路而忘險冒松光而入幽曲
阻駭心清曠絕目徇人外之遐觀霞表之靈境也如

是三日始達括蒼日色放晴山容復改危崖半傾若
斜景之入海巨石自轉同高穹之隕星彌習彌艱轉
伏轉起覆磴厯厯曲如螺旋輿夫盤盤時或猿挂如
是二日始達縣治山城斗大荒倄迭進坐是不樂彌
觸孤抱惟君玉鏡卜遠清閑自憐奇書課女將母呼
爺食性諳姑以婦代子夜雨承雷動成自淒之音晨
葩在瓶定有誰適之感凡惠心之所屬悉鄙意之所
經惟望善遺積懷慎衛眠食鞠前桂後會相晤言

舊傳雙忠廟聯云恭喜二先生得福全歸研名教頭
抉忠義肉快活極矣可憐一介士無錢祭奠秉春秋
筆灑英雄淚嗚呼痛哉

溫壯勇公紹原字北坪江夏人堅守六合卒以身殉
或挽以聯云不請兵不請餉不請功以一旅義師禦
四圍強寇鐵錚錚好男子或死忠或死節或死孝舉
全家骨肉殉滿縣生靈風慘慘有餘哀張忠武公國
樑字殿臣高要人戰死丹陽李春生挽聯云統萬軍

討賊數年壯哉慷慨捐軀到處威名知翼德作兩江
擎天一柱惜也英雄掣肘至今遺恨憶睢陽

元和袁渭漁明經寶璜號瓌禹前在粵東學使幕曾
與唱和備載初筆旋于壬午捷鄉試第三名今春至
羊城重晤爲作二筆及松筠閣貞孝錄序二篇後出
示寄蛣詩古體多用全韻及疊韻長篇句多奇傑宗
法韓孟近體如五言云無才例藏拙多病合言歸哀
樂中年感風波人海驚七言云支離病骨嗟無用寂

寘千秋愧此生哀樂中年付陶寫恩仇客路忌分明
皆閱厯感慨之語又有仙人怨十餘首有云襪衫破
帽烏韃倒進土頭銜落魄秋贏得鬼奴齊拍手終南
捷徑不知由憫時嫉俗情見乎詞矣

感事詩用典須切合而以蘊藉出之方爲上乘余最
愛何廉昉鼓吹詞詠辛丑西夷事中二首云不用將
軍霹靂弓旄頭未展已平戎但憑割地爲長策猶欲
貪天冒戰功南海無珠仍苦索北門有管竟潛通振

振之趾何窮意盡在吁嗟一嘆中談笑從容却敵兵
允文真不愧書生百蠻通市原非計萬里投荒獨有名
黑白更誰持大局東南從此壞長城惜公不合開
邊貢直道長留愛歎聲

宋王羲豐句云倚松茅屋斜開徑近水人家半賣魚
王漁洋好是日斜風定後半江紅樹賣鱸魚蓋本此
而鍊之益工余家之西有河石橋跨之水極清澈常
產銀魚他處則否故雜憶鄉居詩有云好是月明風

靜夜石橋西畔網銀魚是又脫胎於漁洋者也

二筆第二卷摘錄汪仲穆孝廉澹餘詩略數首其弟
叔明司馬有詩書畫三絕之稱近見司馬題畫詩五
律云眾綠已成幄茅齋四面清殘花蜂割席嘉樹鳥
專城枕簟憇餘潤軒窗無俗情此中有佳士日夕起
吟聲七絕云山青雲白水拖藍柏紫楓丹映客船此
景平生最相憶嚴陵江上早霜天

新安許少玉太守長怡玉叔先生嗣君也余往來金

陵常與泛舟秦淮爲題白門新柳記詩少玉將需次
浙江薛慰農觀察贈以聯云與君話別白門柳爲我
補栽孤嶼梅少玉得之甚喜乃不久遽卒年未五十
也幼亟近錄其詩囑採入之以存此亡友秋夜懷鮑
小渠云秋月明如鏡秋雲薄似羅相思殊未已何日
得重過詩較去年少夢從今夕多靈陽河畔路猶有
踏莎歌八月干戈起倉皇西復東五年風雨共千里
夢魂同黃葉凝成碧寒燈淡不紅懷人無限意書就

付秋鴻

陽湖楊蘊萼女史名璿華楊蕉隱大令晉藩之女適宜興徐氏早寡事父母以孝稱能詩詞兼好篆隸有聽秋館詩稿書感云夜靜不成寐蟋蟀吟空庭元鳥將辭巢陽禽代南征我行未休息日月不暫停芳華若駒隙四序頻相更蘭茝與蕭艾千古同飄零怨別詞云長波浩漫不可接獨客天涯怨離別美人不見空懷思秋草茫茫望中極九嶷漭漭楚澤迷洞庭木

落風淒其一從滄海各飄泊瑤臺璇室成荒蹊湘蘭沅芷惜遲暮修名偃蹇徒生悲舊游零落若星散此身坐令芳時移百歲光陰過彈指頻年常使風塵羈深宵不寐獨愁寤天風泠泠隔窗度颺颺庭樹鳴枯條促織哀吟似相訴何當捐棄胸襟憂揮手紅塵上元圃夜宿中渡云孤艇野烟白秋高水拍堤天空沙岸闊山迴夕陽低渡冷行人少途荒村落迷明晨復登陟從此入青溪春暮云綠陰如許又殘春櫻筍初

肥物候新客裏芳華留不住倚欄愁煞惜花人斷句如五言云小別如千秋何況遠遊客又云渺渺江水深離愁不可載七言云貞魂毅魄不消歇散入空山化杜宇秋宵吟起句云清宵無人獨危坐坐聽譙鼓催離憂憂來夜半不成寐疎星炯炯明高秋皆取法甚高無閨襜綺艷之習

聽秋館詞亦有數十首清平樂云晝長人倦寶鵠沈烟暖檻外閒雲和夢捲寂寞綠陰深院愁多懶整

花鉢酒醒猶是慵眠鶯燕已銜春去空餘長日如年
臺城路蓬山秋夜云小園一夜西風急羈懷更添寂
寥敗葉敲窗清寒驚夢頓起閒愁萬斛鷗盟搖落況
雁序無多又分南北自擁羅衾靜看冷月透簾幙
霜毫寫就新句但知音別後誰和新曲燈暗砧殘天
空籟靜聽盡千山落木柔情難托悵拾翠吟紅舊時
行樂回首前遊幾人能再續又有百字令云雙槳搖
風片帆挾雨疏柳啼鴉冷高陽臺柳花云正江南已

過清明綠遍樓頭疏簾淡月云冰輪似鏡正一片天
風亂雲吹淨又云十年舊事被他四壁暗蛩啼醒皆

清婉可誦

庚申年常州城陷婦女殉烈者縉紳家尤夥丁定甫
大令之女靜蘭有絕命詞調倚滿庭芳云萬里銀波
漏殘人靜寥寥天籟無聲寒窗孤影獨自對殘燈無
限淒涼舊事細追思黯黯傷神問姮娥何因生我弱
質太彫零銷魂當此際空梁懸影誰與招魂但留

得清名薄命傳人此去黃泉前路了茫茫指示無人
惟臘此一痕冷月送我去尋親

陸章甫別駕初娶史氏爲佳若觀察之女有醉霞仙
館詩明妃曲云玉面貂褕映雪花長安回首暮雲遮
傷心不及南飛雁猶逐西風入漢家五言斷句如驚
寒云病如秋有約愁入夢無痕春游西湖云鳥啼蘇
小墓人拜岳王墳七言云雨餘小苑苔生砌風過閒
庭葉滿階年光似電催何急世事如雲悟却難卒年

二十有四

江右李秀峯學博書來言在章門書肆見余所著隨筆二筆十六卷因抄示近作四十六紙美不勝收最愛其都門醉歌下半首云今日城東南明日城西北酒肆家家識李白旣醉欲辭辭不得辭不得可奈何一醉再醉還狂歌歌罷長揖出門別明河在天星皎潔街鼓鼕鼕宮漏殘朦朧踏碎滿街月頗覺酒氣拂拂從十指出旣醉欲辭辭不得一語尤見當時酩

酌情狀

張君小琴見余所刊隨筆亦自西江書來並以新刻
之秋園小詩四卷寄示皆五七言近體也維時君年
七十矣其詩舊鈔存行篋已摘句入隨筆中今復覩
是編披吟竟日復錄全首二章悼亡詩云纔種芝蘭
祇一株便辭塵界返仙都半生辛苦愁兒女十載殷
勤奉舅姑人到分離情最慘境當悲痛淚偏無蕭齋
此日淒涼甚月照紗窗對影孤留別馥雲女云天涯

何忍別嬌兒不禁臨風老淚垂千里關河難跋涉半
生骨肉易分離好宜家室勤中饋莫戀庭闈寄遠思
與爾偕來今獨往征帆回首悵前期其詩註附其女
馥雲女史詩有夕陽紅送片帆遙之句又其姪女玉
貞女史以貞孝受旌能詩善畫蓋一門風雅云

濟甯劉蓉舫太守出示其封翁松巖參軍祿餘詩稿
六卷嵯峨八詠情景如繪蓋其權大洲塲所成也題
潮州小陶然酒樓云水色山光到眼前興來同醉小

陶然清樽白髮重遊客細雨黃花九月天堪歎浮名
爲俗累肯將傲骨受人憐湘橋仙跡誰能續跨海何
曾石可鞭避暑龍宮別院云水晶宮闌畫蒼茫溽暑
無由到上方寂寂僧房人跡少蕭蕭落葉午陰涼壁
間長有風雲氣座上時聞齒苔香塵吏襟懷難免俗
憑闌不語對斜陽絕句風韻尤勝遊惠山云如此名
山好繫船漪瀾堂上聽談禪松風半榻茶烟裏要試
人間第二泉摘句如春柳云多情對客頻開眼解舞

逢人便折腰上元珠江卽事云市地笙歌游士女漫天星斗混魚龍大通烟雨云向曉烟痕濃護井隔江帆影淡浮空蘆江感懷云隻眼千秋慚讀史浮蹤冊載敢逃名示兒云書莫貪多須要熟句應求好不妨遲贈高秀山云白頭愧我生斯世青眼如君有幾人皆可誦也

又有題云蘆江小渡艇招客有上邊來下邊來之分終日呼喚不已戲吟云送郎過渡載郎回寄語閒鷗

莫浪猜底事上邊忙不了又聞低喚下邊來亦竹枝詞之佳者

北路客寓多士妓下車入店卽聯袂而至昔人詩云若使桑麻真遍野肯行多露夜深來讀之婉而多風又有題壁詩云可憐燕燕鶯鶯語都是哀鴻變調來尤覺沈痛

吾鄉何廉昉太守好集蘇句書楹聯余辛未年里居小築草堂太守贈聯云他日卜鄰先有約此間真趣

豈容談又贈聯云身行萬里半天下眼高四海空無人集句渾成惟次聯過當余題王子壽比部弟子趙君螺山問字圖絕句比部見之稱賞亦集蘇句寄贈楹聯云千里論交一言足妙齡馳譽百夫雄

交游中亦多有撰贈楹聯者馮子良太守云漢朝宰相千秋第吳會英才一輩人何鏡海觀察云千頃澄波黃叔度一時文采阮元瑜蔣篆雲學博云漢魏風華資大筆山川佳勝紀清游時余客江右薛慰農觀察云

襟懷朗抱澄江月蹤跡同看鍾阜雲

時余游金陵

管才叔

明經云脫畧公卿跌宕文史抑揚人傑雕繪士林陳

蘭甫京卿云高才必爲一世用新詩說盡萬物情近

汪君芙生云詩有萬篇陸務觀書成五筆洪容齋類

錄之以誌雅覲

明末永新賀子翼貽孫水田居士文集有紀西安留
氏事曰先君官西安時有劉姓告其祖墓被侵兩造
庭鞠仇家曰彼自姓留今稱姓劉詐也先君怒詰之

其人頓首哭曰公文丞相鄉人也某何敢姓留昔萬
厯初吾族曾以祖墓事訴於太守張公訊於留氏宗
祠見堂上有畫像問何人對曰先太祖曾爲宋狀元
丞相者張公叱曰得非老賊留夢炎乎此賊負宋欲
殺吾文丞相恨不掘爾墳燔爾骨也手撤其像杖宗
子臀五十今公又江西人設如張公復理文相舊事
先人遺骸且燔矣某何敢姓留先君笑曰汝祖負宋
罪也子孫何罪乃平決之

江西分宜縣嚴嵩之裔尙繁一日市間演劇演嚴嵩
故事窮極奸惡狀觀者嘗罵嚴姓族人羞忿爭毆訟
於官官曰此優人之罪也令優仍扮嚴嵩狀荷校于
市標之曰枷號嚴嵩一名此令可云善謔

黎蘊齋星使庶昌在日本刻古逸叢書光緒十年片
奏云再刻書雖非使臣所及而日本同文之國尙
漢學千有餘年墜簡佚文往往而有臣自八年春間
訪獲佚書古本多種卽命隨員楊守敬經紀刊刻題

爲古逸叢書其中頗有拾餘種可補 四庫著錄之遺本年秋間一律完竣除將板片運交蘇州書局作爲官物聽人刊印外理合附片具陳再此次刻資係由經費存息及臣薪俸所餘項下取給亦有長崎廣商鍾仕良何獻墀捐助之款概未動支公項合併陳明後李芊仙大令士棻有柬純齋呈使七律詩其序云純齋在日本校刊唐宋逸書廿餘種其全帙多踰百本頃承以老莊荀子見贈求窺其全則云在東

京曾印多部已爲達官貴人紛紛索取盡矣現在莫
善徵大令方集工匠於上海縣署先印五十部然後
書板歸之蘇州書局此五十部者亦必達官貴人乃
得而有之蘊齋始刻此書時豈必爲達官貴人計而
達官貴人視其全帙竟無殊於奇珍異物必得而後
已蘊齋亦不能不如其意以副之而後無意外之患
甚矣達官貴人日勞勞於民生國計猶復分其心以
先獲新書爲快況子宿有好書之癖二十年前與蘊

齋定交皖上時日偕莫子偲徐懿甫姚慕庭輩往來書肆蕪齋無一日不在其中頃年予滯留滬上朋好屢有餽遺予則以三分供衣食旅費以二分償游讌必以五分充購書價直而後盟衾質影自勘自慰旅館中堆牀疊架無非書者先師徐稼生夫子往在都門顏子所居曰不廉於書之室蕪齋之所稔知也聞蕪齋刻書之舉甚盛預爲一詩謂蕪齋必能修先朝獻書故事飾此書以玉躞金題爲表一通進呈 御

覽禮也例也誰敢議其侈者何竟爲達官貴人所奪
至無以應故舊中愛書成癖者之求設子偲懿甫今
日尙存蒞齋果不以全帙持贈否耶抑將曰吾無如
達官貴人之紛紛索取卽芋仙坐吾以逸書悅當路
亦雅賄也雅謔也人人競執佳書爲當路獻安見達
官貴人不屏棄金幣狗馬之好而移其情於簡冊益
復采訪先賢遺向未刊行之本集貲閑雕嘉惠士
林繼蒞齋起而庚續之俾士林頌達官貴人之眾擎

易舉速於置郵也豈不偉哉詩云古逸書從日本刊
後先持贈恢心難原期漁獵供寒士姑代苞苴勸達
官竹素不隨前刲盡芸編合有貴人看胸中久築憐
才廈萬卷千間一例觀

栗香三筆卷六

江陰 金武祥 潤生

乾隆二十二年

聖駕南巡所過先賢名臣祠墓均遣官致祭吳中周
泰伯祠祭文云善承先志克振家聲慶篤姬宗緒陰
貽於文武心存商祚境難處於夷齊採藥而入荆蠻
爰偕同氣端委以治周禮聿肇雄圖名稱雖泯于當
時流芳雅詠秩祀常欽于後代殷薦馨香朕南國重

巡東吳載蒞緬懷至德尙稽三讓之遺蹤遙溯高風
實啟千秋之文敘式循舊典用展明禋惟以歆承庶
其昭格吳季子祭文云望著勾吳譽隆姬姓才而能
讓高節炳于春秋貴而有文交誼徵于縞紝歎深觀
止聞韶魯國之庭義重生平掛劍徐君之墓傳賢聲
於習禮學契孔門紹芳躅于世家名標史氏宜馨香
之勿替建祠廟而常新朕載舉省方夙殷尙論覽是
邦之文物遙溯流風緬昔日之儀型倍增嚮慕肅將

禋祀尚克歆承先賢言子游祭文云惟先賢言子秀
毓東吳教開南國從遊觀上聞型仁講讓之風出宰
武城本愛人易使之訓守知能而識學原於道辨品
節而知禮制乎情朕稽古時巡心懷賢哲夙仰弦歌
之化益欽文學之宗訪宅里以非遙命具官而薦饗
靈其昭鑒妥此苾芬

吾邑前明時以忠直氣節著史冊者有繆文貞公昌
期李忠毅公應昇文貞萬厯癸丑進士忠毅萬厯丙

辰進士先後死奄禍文貞從野堂集前歲得於廣州
已載二筆忠毅落落齋集余未之見縣志載二公被
禍時各有詩文貞入檻詩云嘗讀膺滂傳潛然涕不
禁而今車檻裏始悟夙根深一死無餘事三朝未報
心南枝應北指視我實園陰實園在祝塘文貞讀書處示兒云諸

兒初了了長大竟無成往事渾如夢遺經累後生覆
巢奚有卵刈草豈留萌幸得收吾骨還須隱姓名忠
毅赴逮詩云已作冥鴻計誰知是僇民雷霆驚下土

風雨泣孤臣憂患思賢聖艱難累老親生還何敢望
解網頌皇仁聖聽方虛己恩衷敢瀝丹慙無一字補
空復數行彈臣罪應難赦君恩本自寬淒淒楊柳色
誰爲問南冠二公詩同一悲愴

忠毅公詩江上詩鈔錄一百餘首五古云士當貧賤
時俯仰願易足一溪可垂釣環堵數竿竹負郭百畝
田妻子飽餧粥良朋絜壺過清月枕書讀及其志已
盈望奢天地促耽言忠厚名喜逐澆漓俗回視昔年

人邈若山與谷嗟哉止足難古道不可復此憫時勵
俗之語又白下送友歸吳門云秋風催落葉惆悵送
君行別思知何許江濤夜夜聲姑蘇千里道四望暮
雲深日落孤帆遠相思何處尋頗有盛唐氣息

吾邑文貞忠毅二公被魏璫之禍最酷其先尚有被
劉瑾之禍者御史貢公學靜名安甫史公禹臣名良
佐以劾瑾廷杖職方黃公明甫名昭以忤瑾削籍李
戒庵稱爲一時三忠當時朝紳贈詩有三虎殿前聲

正烈之句趙味辛樂府三虎引有云三虎當殿同一
嚎嚎聲直入天闇高天闇不省人間事羣小縱橫爭
肆志囊頭拜杖血染衣竟許生還亦天意

貢史二公著作無傳志稱黃公工吟詠尤長古文江
上詩鈔存黃公詩七首贈楊升庵云昔在長安日相
逢各少年雲隨香案吏風送玉堂仙漢檻星辰動秦
臺日月懸疎狂仍故步春興滿南天登金山云萬里
滄波聳碧岑百年豪興此登臨看來天塹有南北流

去水聲無古今鼉極靜依山勢立龍宮遙瞰海門深
長吟不盡興亡恨廊廟江湖共此心

吾邑以制藝名者 國初戚介人先生藩海內稱熊
劉戚趙四大家乾隆時則蔡芳三先生寅斗殷會詹
先生兆燕皆有稿行世介人先生之兄烈愍公勲乙
酉之變閨室自焚所傳臨難題壁詩云血灑危亡地
心安烈燄餘朝來牆上日應見數行書著有留丹集
失傳先生號蘧庵順治乙未進士知安定縣有惠政

祀名宦祠所存詩不多歸田云歸計原從筮仕前力
田端不爲逢年千秋自有雙眸在四海曾虛一榻延
箬笠半隨樵牧老芒鞋全作水山緣縱令閉戶愁雲
繞土室袁安亦坦然斷句如山行云雲同卧石青日
與暮霞紫夜坐云孤燈如好友晤對拭鋸鐸北山道
中云陰崖緣水曙落石倚雲支邠山云露滴水簾搖
絕壁雲浮石屋枕荒苔登椒山謫居書院云絕塞皋
比懸日月明廷血奏挾冰霜錄之以見先輩遺風

蔡芳三先生乾隆丁卯舉人先舉鴻博不就鄂文端公嘗集七郡士會課春風亭先生冠其曹著有九賢堂稿余近見南邦黎獻集中有先生詩古文二十餘首別裁選詩五首最賞其遊盤山詩地勢直從滄海盡山形還向太行迴謂有海涵地負之概將進酒云君不見天有酒星地酒泉個中得趣稱酒仙大塊文章恣揮灑何事瑣瑣徒拘牽古人作達類如此騎鯨捉月偶然耳現前景況不自知明月清風等閒事唐

八賢晉七逸放眼還嫌九州窄後先寄托將毋同吾
獨何爲自嗟咄只今請醉金叵羅一飲三百顏常酡
婆娑起舞發浩歌那知人世多坎坷五律宗法盛唐
久不得萬星鍾消息云芳草滿湖綠與君分袂初星
霜驚幾度遇合竟何如蘭閣誰投刺侯門懶上書天
涯頻悵望獨立久躊躇又題玩芳圖云愛此三徑寬
翻嫌九州窄送諸大云秋風催客鬢冬雪點征衣慰
友人云雄心全却否結習可能無雪夜云比來寒正

酷忽爾歲將除七言如白太傅云親民詎減登臨興
覽物仍兼利濟思林和靖云清極只看梅數點飄然
惟羨鶴孤飛岳忠武云白馬南來成底事黃龍北上
竟無功秋懷云共慶蒼鷹收北寺翻憐黃犬出東門
皆渾雅工切制藝固不足以掩之也

別裁云芳三工古今文及駢儻韻語聞四方有才人
必遠道走訪與之定交蓋以文章友生爲性命者也
壬申 恩科會試自經于號舍中不解其故人謂之

遇崇文人之厄一至此耶

殷會詹先生哭蔡芳三云握手君何往相思我獨長
自從歸冥漠不復論文章素幔隨流水悲風冷白楊
向空頻酌酒泉下那能嘗薄俗憐今日盟心憶舊時
盛名人盡仰古道我深知入座親遺照開函檢贈詩
途窮渾仗爾回首涕交頤會詹先生乾隆甲戌進士
甘肅伏羌縣知縣有偶存草感懷云驅車將遠適不
知何所之仕途多捷徑所愧如韋脂卓哉陶靖節曠

達真吾師棄官返故里乞食苦不辭此行未爲賤反遭俗士嗤春風散幽襟聊復銜吾卮又云名利日相誘至性乃漸淪又云奈何康莊道轉眼成嶮巇寄慨無限詩格亦極高渾

史問樵先生有光鄉試屢勝輒蹶以明經終老季文敏公其外孫也家故饒裕好游工詩詩境與翁朗夫徵君相似屠賢書刺史序云陶冶百族受裁于性靈不名一宗倜儻自喜云云夢遊玉笥山歌上法青蓮

篇長不備錄絕句云雁影橫空落水邊舟人閒語夕
陽天歸潮相送艤聲急搖動一灘蘆荻烟又云窗外
微雲濕翠巒熟梅天氣雨漫漫啼殘好鳥不知處門
掩綠陰清晝寒皆神韻獨絕他如五言云鐘聲林際
寺燈影水邊村有竹影亦好無花春自香沙黏雙屐
雨帆破半江雲滿徑落紅葉遠峰多白雲樹影圓於
笠波紋碧似簾七言云雨移春色歸芳草風約花香
到畫樓抱村楊柳深藏屋掠岸鷺鷗健打魚野鳥影

迴秋水岸晚鐘聲度夕陽山誰叱烏犍楊柳外一簑
烟雨一犁雲見燕云細雨落花情脉脉夕陽飛絮影
翩翩與錢玉書云世上問誰知馬骨客中有路總羊
腸七十自述云案頭書積開常嬾枕上詩成起便忘
與賜書堂可稱勁敵也

問樵先生徐節婦詩云

節婦盛氏邑人徐民望之妻庠生由勉之母

重夫恩妾敢生重夫祀妾敢死夫死妾何依妾死兒何恃
兒能讀書妾辟纏空房夜夜聞啼鳥聞啼鳥淚如雨

朝來對兒述夫志夢裏見夫說兒苦力持門戶三十

春兒婚既已畢兒名亦已成率兒婦拜夫墓白日下

高天暮妾心盡矣夫心安相逢含笑黃泉路嗚呼相

逢含笑黃泉路 先祖朱烈婦詩云

涇縣朱庭謨妻
疾革引刀自刺

願以身代遇救得生夫
歿孤成立今已游庠

夫如生妾可死籲天懸血深

閨裏夫已死妾宜生哺雛翼卵涕泗橫青燈熒熒藥

鑪小當年艱苦誰能曉仰天難覓返魂香顧影惟餘

拔心草引刀自刺何從容不知有刀但知有儂以身

代某天頻呼不知有儂但知有夫吁嗟乎鼻可割臂
可折祇恃區區此心決君不見撫孤今日搏扶搖報
答重泉恨漸消閒來試把霜鋒看轉覺芒寒不敢操

二詩同一機軸

余適繆氏姑母守貞殉孝所徵題詞旣略載前二筆
近復勾仁和譚仲脩大令爲之傳曰金女江蘇江陰
人曾祖鑑舉博學鴻詞刑部主事祖捧閭歲貢生父
諤蒙城縣訓導女生儒家習于禮尊母訓少卽敬順

好讀書通文義父母絕憐之將字謹擇壻同縣舊姻
繆宗慶世家子英雋有文乃委禽焉已而宗慶溺苦
於學疾遂沈痼死之前夕母女皆夢宗慶衣冠跨堂
未幾訃至女乃翦髮誓歸於繆父母許之適繆成喪
服備婦禮女祖母題所居曰松筠閣時舅久客姑年
六十疾作女奉養周至如事母也舅歿京師姑病且
殆賴以瘉宗黨益嘉歎以兄公伯英次子光佐嗣宗
慶女撫之令就賢師傅學姑喪拮据營葬除服爲嗣

子娶婦王生女而光佐又死姑婦營斂再嗣光佐兄子爲孫半年而殤女曰心力瘁矣吾在爲先舅姑支門戶我死則已矣母氏聞之則迎女攜王與孫女歸母家慰二親宗慶同產兄步瀛尚有子議以兼祧女依母孝養無方兄弟皆出游至母病卒醫藥棺衾盡誠盡禮淺葬樹碑石焉祭之日女曰侍母久苦志惟母知今已矣可以從死矣一慟而絕宗慶死時女年二十四卒年五十六守貞三十三年終以身殉母也

時同治二年冬十一月有司請於

朝旌典如律令

譚獻曰未畧守志儒者多異議顧甲令有請者許旌論定矣昔言守節易撫孤難嗣子授室不生男生女再世孀嫗尤人世所難任卒以誠感家庭爲寡婦立後亡夫無子而有子豈果好爲其難哉金石不渝其至性然也晚乃殉孝人倫備焉

曾祖玠堂先生藏有宋拓十三行厯刲未燬趙味辛

先生跋云余慕荆川先生所藏十三行久矣今年正
月始得觀於二南堂精采煥發無毫髮遺憾自思翁
以下至退谷義門諸公咸有題識爲宋搨祖本無疑
故元晏齋從此摹刻已足高出一時也如饑之思於
是少慰頃玠堂復以此帙見示古香觸手神鋒內潛
與唐氏本實堪伯仲昔思翁跋十三行有武陵漁人
再入花源之歎今一歲而再獲奇遇翰墨之緣可爲
深哉乾隆癸卯十一月又蔣公齊耀黃公宗均有跋

畧云十三行自元晏齋外尙有白氏雙鈞本少遜一
籌又楊氏謙謙齋石刻亦形似而神不靈惟此本形
神俱足當爲宋搨無疑今擬以石印法印數百本以
廣其傳云

唐林寶元和姓纂云金少昊金天氏之後見風俗通
望爲京兆則祚侯之後漢末有武林太守金族族生
穉見魏志云云余按休甯金氏譜元時有以程氏入
嗣者支派亦繁有以劉氏因避吳越錢武肅王嫌名

更姓金氏者又有劉氏因避秦檜之難更姓金氏者又有西域默伽國人明初歸義賜姓金氏居金陵金大車字子有嘉靖乙酉舉人有方山遺稿其宗族昆弟頗盛有文名皆默伽裔也

鐵槎山房見聞錄明時文登叢少保蘭以工部尙書總制三邊初爲貴溪令於張真人處遇同鄉李龍神爲神緩頰俾回家視母後公暑日徒步頂上必有烏雲一片相覆蓋龍神之報也池北偶談云叢公乃漢

稺侯金日磾之後四十五代孫永居文登縣之叢家
峴遂以爲姓科名甚盛

池北偶談又云江西多淦氏舊傳亦稺侯後有金賦
者爲制置使宋高宗爲加點水遂有淦姓詳載余皇
華紀聞 皇華紀聞云淦君鼎字和之建昌人本漢
金稺侯後以歲貢授贛州府學訓導假通判銜辦事
軍前爲楊萬二公所重贛城破遣長子弘斌脫歸遂
肅衣冠自經死或作輓詩云見說生平不炫奇恂恂

處子少人知時窮忽作驚天事志士從來有不爲
曾祖母蔣太淑人爲倉場總督晴厓公諱炳季女諸
昆中如靜存太史名麟昌南莊刺史名龍昌立庵太
守名熊昌皆以文章循績著稱於時南莊先生題
先曾祖詞稿洞仙歌有君本儒宗更佛心仙骨之句
又 曾祖客窗筆記立庵先生爲序刊之唱和詩猶
有存者蓋文字之契尤深云

先祖母史太淑人爲溧陽史文靖公曾孫女嘗言母

家有牌十對一曰一品當朝二曰兩江總督三曰三
朝元老四曰四代同堂五曰五子登科六曰六部尙
書七曰七省軍門八曰八旗敎習九曰九門提督十
曰十度 欽差皆文靖時事亦佳話也

吾邑志第二十九卷附寇變紀略言粵匪之亂略云
江陰古節義邦也有明中葉島夷犯順守土之臣膏
血原野而其屬堅壁待援九死勿悔城卒以完革代
時孤忠抗命甘比殷頑一彈丸地揩柱萬狀至於窮

蹙而後已江之人豈偷息旦夕者耶我朝江介清晏民累世不知金革道光壬寅英艇駛入黃田港徐州戍兵與江人交証禍且叵測知縣金咸言於鎮將得解猶安堵也後十有九年而有庚申之禍粵逆踞江甯郡邑震動是時大營在丹陽制府駐節常州屏蔽下游恃以無恐江南諸軍欽差大臣向榮統之提督張國樑幫辦軍務控遏凶鋒聲威甚盛榮咸豐庚申閏三月己酉大營潰驍將死殆代者和春綏寔臣亡命賊騎擣虛東下靡有撓者藩籬既撤遂

受長木之標而江禍亟矣

大營屯秣陵關賊勢蹙適

死突圍而我軍餽不時給人心搖貳是日大雷雨酷寒一夜之間各營火起遂潰國樑負重傷殉和春走

死總督何桂清逃之海上江故有練局既弛矣城中官弁無可倚

知縣祥和不理人口武弁海洪阿陶廷芳束手無策

四月乙丑朔諸生徐思鑄夏勤墉章挺等請於學使者使者仍下之縣別爲局

募丁壯儲軍火修器械部署甫定而賊已薄城相持

四五時許勢不支丁丑城遂陷

祥和遁廷芳死城下洪阿死於道思鑄勤

墉挺死於局諸生罵賊支解者十餘人巷戰遇害及閉門自盡者不可勝紀語在忠義錄

方事之

殷也夏港人吳英

諸生有文行各鄉舉鄉團英最知名聞郡警鳩西鄉

十鎮之眾誓於其祖吳季子廟白巾而出擊賊仇莊

敗之自庚午迄丙子轉戰數日斬馘亡算

壬寅追賊至郡城城

上人招之以誠英疑不敢進問之土人郡城已於庚午陷矣

賊不得逞以游騎數

百綴英於天齊廟別遣大股間道犯江

邑西界常州北臨大江沿

江舊有馬路賊陷常郡逕馬路直撲邑西門或曰廣艇導之也英聞城破衣冠自沈

死西鄉之圍悉潰而江禍烈矣夫江之人素以節義

著聞倭亂守城四十餘日乙酉之變守城八十日而

狂寇西來朝攻夕陷此何故哉內無提倡而鼓舞之者守臣昏鄙武弁恇怯思錯勤塘埏等旣倉卒不可集事英之孤掌亦奚能爲役迨西鄉糜爛而東南之團起枕戈藉刃八十有二日而始散則猶江人氣節之不可泯也東南若祝塘長涇華墅顧山文林皆有團皆彷西鄉白巾而祝塘王元昌爲之倡元昌孔武有力里中
剽悍少年皆與之游元昌遏賊東南嚮錫賊北來無禦之者延錫人戶部楊宗濂之屬梁國泰者將之國泰鄆城人
傭於宗濂家

短軀黑袴人爭效之
賊見黑袴隊卽卻

於是近西者隸元昌局於祝塘

陸橋近南者隸國泰局於文林河塘橋而東南之團

稍振賊旣陷城四出焚掠己卯寇長壽庚辰寇祝塘

元昌帥四百人擊走賊

賊方閉門搜括元昌與其里人孫四踰關入各提一頭出

眾踴躍大呼賊驚

鄉人聞元昌勝爭負未從之知常

熟縣周沐潤遣武生徐浩等赴援嚴康保者故水勇

也有黨數千皆獵悍至是來會勢益壯癸未賊復寇

祝塘邀擊之賊大披靡棄城遁城遂復

團兵入城將守之祥和以

廣勇至元昌慮有變遂去

祥

顧莫之守也

沐潤上復
城功授元

昌康保都司職沐潤攝府事檄

常熟丞施鑑攝縣事駐東鄉

五月己酉賊酋黃文

金率大隊至城復陷時國泰駐陡山

錫賊出掠國泰
邀截於此屢戰

屢捷元昌駐毘山辛亥賊寇三官鎮敗楊庫兵於大橋

又敗之於朱家楊

楊庫孔道賊
窺伺久矣

壬子寇后塍康保敗

之周莊奸民導賊出毘山牽掣元昌陰遣悍賊由蕭

岐璜塘突犯祝塘幾不守宗濂國泰以二千人自陡

山馳援賊眾殲焉

兩岸賊幟林立國泰登高而望曰
南岸皆疑幟急擊其北賊不戰而

退遺衣械遍野宗濂曰此誘我也令取一物者斬眾
肅然賊計沮圍兵兜勦擒斬四千有奇逸出者諸圍
截殺毘山賊亦潰賊自是閉關不復出有業箍桶者
無餘

說元昌乘城願以身先元昌信之馳書諸圍國泰不可元昌獨以祝塘人往六月甲子薄東門入之將半
賊自西出繞左右杜其後先入者盡殪元昌以身免
兵勢大挫己巳焚祝塘燬陸橋局旋犯長涇庚午寇
華墅又犯張家港壬申復掠陸橋七月戊戌賊至華
墅復至陸橋犯長涇顧山陷楊庫踞其城自元昌敗

衄戰數不利國泰康保小有斬獲勢已孤康保負創
死國泰走常熟死元昌北渡東南之團悉潰江故巖
臺必爭之國自宋以來傳烽燔燧不久卽定倭之亂
也鄉蔓而城全明之亡也城燄而鄉熄迄於今日窮
鄉殷鎮悉成煨燼其未燼者被髮伊川三厯寒燠而
江禍至此極矣同治癸亥四月署巡撫李鴻章檄總
兵劉銘傳以上海軍至提督黃翼升親統水師壬辰
薄楊庫戊戌克之五月丙寅知州李鶴章督諸軍攻

克顧山長涇援賊

鶴章駐常熟王莊章護普潮侍五逆率黨八九萬圖援江陰自顧山

至錫賊營連亘數十里五月庚申撲楊彊

銘傳擊退鴻章令銘傳七營進北固郭松林吳建瀛黃中元八

營進南澗膝嗣武張樹聲周盛波八營進茂市橋翼

升水師分應之鶴章列陣顧山是夜乘月刦賊營鼓

謀而進賊眾奔潰顧山

以西七八十里悉平七月丁巳進薄城下

賊首陳坤書并

潮武齊區四逆糾黨十餘萬自常來援鶴章檄張樹

瑞禦之令松林衝其背勦破祝塘璜塘賊巢出周莊

與樹瑞合

遂逼城下癸酉我軍合圍困之轟其城垣蹋者過半

八月乙亥朔軍夜縋而登逆酋李愷順焚所居開西

門遁城遂復

松林督樹瑞等七營伏山後銘傳由中路進周盛波盛傳循城出其右擊東南

援賊又以四營出城西綴無錫援賊翼升水師扼江
干誘賊出戰賊層層抵抗松林自山後殺入銘傳樹
珊瑚直擣中堅賊大潰沿河石營土壘一律掃蕩
翼升又攻克西山賊營各股援賊俱盡乃合圍戊寅

鴻章至自福山檄駱國忠署京口副將率所部守之
銘傳屯青陽九月丙午擊賊芙蓉圩己酉克焦墊東
路悉平甲子二月宜興溧陽殘賊循江東竄丙子奄
至南閘逕周莊華墅楊庫犯福山所過焚殺城中復
警我軍撲滅次第就戮而居民流離奔走顛踣泥淖
中受飢餓冒寒雨道殣相望存者枯槁疥癩無人色

或數百文錢易米一撮慘酷更倍於前四月丙子郡城復六月乙酉省垣復江南肅清子遺之民始有生氣云

乙亥九月道出潯陽訪琵琶亭遺址不得遂遊甘棠湖周約十餘里中有墩圓如月白香山作亭其上後人因別時茫茫江浸月之句以浸月名之則猶琵琶行詩意也宋時周元公長子重建改名烟水亭其湖名甘棠則以南唐刺史李渤築堤而名東坡詩春酒

一變甘棠湖卽此地余喚渡而往中流容與導之鷺
鷗危琦兀然翼以欄楯此湖北濱大江雉堞梵宮參
差隱現其西則闌闊闌咽樓臺倒影歌管時聞沿堤
半栽楊柳秋霜乍拂旖旎欲黃南望廬山蒼翠撲人
則五老匡君如在雲中招手杳初白屢游此湖有云
一奩明鏡插芙蓉直可寫入圖畫此亭據湖山之勝
恐當日琵琶亭無此佳景也亭有聯云恰好亭臺駐
烟月可無觴詠對湖山又云疎烟流水自千古山色

湖光共一樓亦能言其大概

桂未谷晚學集有四鄉記云鄧川官署葺屋三間顏以四鄉四鄉者何安一茶鎰目曰醉鄉立一拄杖目曰睡鄉放一蒲團目曰溫柔鄉置一瓦鋸目曰無何有之鄉乃爲之記曰余固喜飲今以病止酒逃而之茶旗槍再戰不待七椀如倒巨觥矣雞足山釋子送迦葉杖余猶健步不恃杖每倦思卧則曳杖出門散步步良久忘其杖杖亦忘吾徙倚自得又何北窗之

可懷乎平生不解禪而好色嘗謂真好色可以通禪
大禪家無妨有妓世間繡幄翠被鏡臺香澤未必如
蒲團之靜好也心慕鄧通石崇多財惜其不善用然
此中有命焉非鎰銖積累所能致故雖有撲滿曾不
投一錢付之虛無而已客曰聞子之說觀子之志殆
將老於四鄉與曰不也寄焉爾他日歸田發舊醅招
大戶布席老樹下捉臂行觴醉則魚貫眠或有東鄰
之女相於目成不辭爲之賦方且居奇持籌日有月

富藏金盈窖鼓腹而嬉吾豈久滯萬里之外老於四
鄉者哉

無錫顧梁汾先生彈指詞三卷光緒戊寅其族孫酉
山名綬珊重刻之余近見丁采之評本乃先生元孫
味澹名茹者於道光元年手錄于粵之東莞署中編
分四卷較之酉山刻本多四十四首蓋足本也當郵
寄無錫續刊之而錄數詞于此望江南四首云江南
好燕子乍來時屢喚不膺挑筭約欲成還改護蘭詩

風日助相思江南好清簾坐瀟湘梅雨生憎調黛濕
麥秋偏愛洗頭涼小立焙茶香江南好秋水晚平橋
千頃綠沈菱葉雨十分香散藕花潮人倚木蘭橈江
南好寒掩小窗紗積雪紅垂天竹子微泉碧注水仙
芽幽事屬誰家浣溪沙云知是他生是此生藥欄花
樹見卿卿似嫌心眼太分明料得已難酬宿願欲
拋爭奈轉多情一回私語幾回驚南柯子云鏡裏看
花發門前聽馬嘶杏梁何事有單棲不見天涯芳信

幾回疑 欲剪同心帶還占薄命詞悄垂簾幕護相思爲祝東風休卷綠楊絲踏莎美人六橋詞云濕翠羣山柔絲幾樹當年傾國曾來處前溪畔是誰招覓個藕花叢裏暫停橈 烟藹橫空露華如雨催歸却訝舟人語西南風緊上輕潮待得月明同倚水仙橋金縷曲壽吳庶甯七十二云曠達如君幾幾曾誇烏衣列戟向來門第咫尺樊籠偏謝却裏足輭紅塵裏應自信籌之熟矣惟有閒身消受得第二泉如鏡山

如綺拏歲月此中寄 人生適意爲佳耳莫空過持
螯時節聽鶴天氣茶局縱橫紗帽側一笑紛紛鬪蟻
那更覓參同眞契辛苦還丹兼辟穀總輸君獨悟長
生理看玉樹繞階起

彈指詞刻本閏六月七夕步蟾宮云玉纖暗數佳期
近已到也忽生幽恨恨無端添葉與青梧倒減却黃
楊一寸 天公定亦憐嬌俊念兒女經年愁損早收
回溽暑換清商翻借作蘭秋重閏余見抄本此詞改

爲喜遷鶯云歡期遠近試說向乘槎倩傳幽恨萼綠潛攜蘭香密約妒煞人間風韻添上青桐一葉滅却黃楊一寸誰同病有淒涼月姊廣寒重暉何損虛猜道解事天公垂老偏難問綉被經年機絲布月到底銀河渡穩寄語多情烏鵲且莫作炎威準待暗裏把些時倒扣算他秋閨

梁汾先生纏塘集一卷祇五言詩二十七篇蓋先生所自選近西山亦重刻之凡見於他刻者不復闡入

王阮亭謂先生詩入韋公之室先生之父庸庵先生
名樞明末舉人有侍家大人山行集忍草庵詩云山
空行跡少乘興集巖扉一徑堆黃葉孤烟出翠微心
皈惠遠社身著老萊衣未得從茲住時聞悔昨非又
云選勝不在遠一峰生眾幽纏塘家法蓋本于此
梁汾之兄匏園名景文廷颺名廷文及弟倚平名衡
文並以才名倚平屢試輒報罷有病鶴詩云夢斷層
霄萬里雲空庭獨立乍逢君三山不返神仙駕一水

終羞雁鷺羣倦翮幾從天外振清音猶向月中聞形
骸宛轉神憔悴願得金丹共爾分不道昂藏志盡灰
猶能緩步踏蒼苔時從闌角穿花去還向廚邊戀食
來落寞不遭塵世忌清癯甯受俗人猜升沈到底還
難料失勢何嘗是不才聞者傷之

梁汾有效少陵七歌云有姊有姊號能文長者曹昭
次左芬針神弟子盡北面繡成買作金縷裙蓋梁汾
有二姊其一名文婉適侯氏有栖香閣集咏玉蘭云

亭亭孤潔玉光寒疑是瑤臺月下看燕子不來春晝
寂卷簾凭遍赤闌干又識小錄載鷓鴣天詞云偶剝
瓜仁排卍字漫將碗底印連環無事上眉彎指爲顧
文婉詞志稱其誤實則秦清芬作也附正之

梁汾長子施湄別駕名統鈞亦工詩杜雲川太史有
涇皋佳公子風格追建安之句卽指施湄也佳句如
故山歸不得芳草意何如淡烟如待柳寒雨不沈山
問柳依春水看人渡野橋志稱其最工五言信然

王漁洋居易錄卷四云武進董元起遺其從兄

元
愷

舜

民蒼梧詞十二卷舜民樂府自成一家洞庭陽羨西
泠諸山水居庸關白羊城虎牢關諸邊塞之作尤爲
奇特其內子亦有易安風調今十二卷中大半予所
評次者又帶經堂詩集題蒼梧詞云才子蒼梧怨清
詞白苧工余按武陽邑志舜民舉順治十七年庚子
舉人未立傳郡人亦罕有能舉其名者藝文志又謂
其詞已佚余爲刻數詞於前卷亦小令爲多云

舜民詞王選詞綜僅錄一首尤展成云舜民以名孝廉忽遭誣誤侘傺不自得故激昂哀感悉寓於詞

詩與詞之界甚分惟查初白楊花詩有人在東風正倚闌句絕似詞中浣溪紗風致可云佳絕

詩人好爲議論查初白評元遺山豐山懷古詩云事後責備之論未脫致堂習氣及自作夷門行云誰爲此策大紕繆公子幾陷無君名又云不聞死事憫晉鄙但見好客誇侯羸故作翻案亦不免遺山習氣

查初白賓雲集與朱竹垞同至閩南聯句及紀遊諸作皆集中上乘惟贈汪悔齋方伯五古一首有人評云煌煌大篇極口褒獎究其極不過索一荔支東道耳何筆墨之不自重若此又云此種詩斷不宜存之不獨累詩品亦累人品余稿中亦有酬應之作周昀叔都轉云前輩名家於酬應諸作都不存稿至文章必擬李杜宦跡必追韓蘇極口頌揚千篇一律此山人墨客積習亟宜屏除

梁簡文論文云立身須謹重文章須放蕩余聞之
先大父云爲人須直爲文須曲蓋文與行有不同如
此二說可以參觀

紀厚庵先生爲文達公的高祖際天崇之時生燕趙
之地風塵澒洞慷慨悲歌有花王閣詩稿百餘首世
不多見半夜云半夜倉皇接報書開緘拍案一驚呼
諸公至此吾何望天道如斯古所無欹枕沈吟連夢
寐挑燈絮問怪妻孥披衣啟戶看乾象黯黯寒星數

點孤登泰山云何地能消鬱鬱情且登岱岱望蓬瀛
無人到處方孤立有路通時更上行四面愁雲千里
合一聲痛哭萬山驚儒生未可譏封禪終是能逢世
太平喜弟至云隔牆一喚驚還喜半夜汝從何處來
携手都忘閉門戶禦寒先遣酌尊罍音書雖近無人
往道路多虞幾度猜今日生歸是天幸旅顏消瘦未
須哀

又過黃金臺遺址云燕昭求俊父遺跡留荒臺古來

士不遇過此恒徘徊我聞莘野人千駟輕浮埃豈有
天下士可以黃金媒偶然得樂毅曆室故鼎回安知
騎奴輩非卽碌茲來風塵日湏洞專閭資眞才睠懷
廉恥將慷慨徒街哀論古尤有特識

又有下第詩四首云十年求仕進髮白志不成青雲
諒無分決意謀歸耕良友喜我聞攜酒就我傾謂我
世慮澹可與談無生醜女不得嫁安可誇堅貞敢以
坎壈士冒此高隱名覽鏡照我顏寒陋難爲狀一一

視妻孥亦非簪佩相桐柳不中梁人生宜自量況有
黍稌田不乏雞豚餉物無兩大理富貴甯兼望已矣
吾何營頽焉適天放儒生困寒卧侘傺恆嗟吁國家
鐘鼎養豈以供爾娛艱難求俊彥將使憂患紓假爾
十萬師手握銅虎符風塵滿河洛自信能平無不如
安我分從我持犁鋤伊昔游京華怪我山林態今日
返田園怪我鄉音改學步亦云勞無益徒成悔所幸
匍匐歸吾足故仍在看婦事機杼呼童課樵采惟賴

皋與夔努力營四海此詩和平渾厚又是一格

孫子蕭太史七夕詩云天上日月疾一歲如一日
日一相逢猶自嫌離別錢璞含詩云纖雲四卷碧空
淨湏說神仙別恨多人世一年天一日算來夜夜鵲
填河同一意而各有其勝錢詩見秋園隨筆

江都蔣超伯麓漢舊錄云謝太傅與王坦之共詣郗
超日晏未得前坦之欲去太傅曰獨不能爲性命忍
須臾耶愛日齋叢鈔余義夫帥蜀題客次春帖云老

子也曾來伺候諸公聊復忍須臾卽用謝公語也東坡有客位假寐詩同僚不解事愠色見鬚鬚雖無性命憂且復忍須臾亦暗用王謝事古曰客位今言官廳

唐趙憬審官六議有人少闕多人多闕少之語闕與缺同苕溪漁隱叢話云政和間先君赴調京師步月景德寺指月爲對云圓少缺多天上月同赴調者應聲戲曰員多缺少部中官通俗編云論衡累害篇位

少人眾仕者爭進當時蓋已患之

漢書藝文云小說出于稗官師古注稗猶稗稗之稗小官也通俗編云俚俗哩小官曰芝麻官蓋卽稗稗之義

俗言奴婢初來爲走盤珠稍久曰算盤珠其後呼之不動曰佛頂珠元時已有該見輟耕錄

麓瀆舊錄云廿諸最有利益金諸傳習錄云諸傳外番因名番諸形如王瓜如藕臂如拳如指如卵如棗

大小不一其皮有紫有白有深淺紅有濃淡黃肉亦
如之蒸熟勻膩如脂甘平益胃徐元扈甘諸疏云諸
有十二勝收獲多一也色白味甘諸土種中特爲貨
絕二也益人與薯蕷同功三也徧地傳生剪藤作種
今歲一熟六年便可作種數十畝四也風雨不能侵
損五也凶歲不能災六也可充籩實七也可釀酒八
也屑之可作餅餌九也生熟皆可食十也用地少易
于灌漑十一也春夏下種初冬收入枝葉極盛草穢

不容但須壅土不用耘鋤不妨農工十二也羣芳譜亦云蝗蝻爲害草木蕩盡惟譜根在地薦食不及人家凡有隙地但只數尺便可種得石許此救荒第一義也

又云相傳番譜出交趾吳川人林少蘭善醫薄遊交南袖之以歸種徧於粵不必沃土不勞農力廣雖凶旱無死徙者譜之力也電白縣霞洞有懷蘭祠題曰

番譜林公廟

麗瀘叢錄卷六云嘗見一書斷瘡方看瘡起何日如
甲乙日起清晨用筆蘸墨在病人背後男左女右寫
計添寶三字丙丁日寫馮良友戊己日寫田良庚辛
日寫任牙生壬癸日寫孟大春勿令他人見之其瘡
卽止

又云墨客揮犀云李餘慶知常州果于去惡吏民畏
之死葬橫山有病瘡者取其墓土置牀席間輒差與
朱瑾雷塘墳土治瘡事相類余按武陽合志餘慶傳

稱其知常州政嚴猛偶得疾醫乘間進利藥洞泄不已餘慶知之杖殺醫歸卧及牀而死未載墓土治瘡事

居易錄第四卷云用生首烏五錢青皮三錢陳皮二錢酒一碗河水一碗煎至一碗溫服治瘡不論久近卽愈

又卷五云蔚州魏敏果公象樞初無子或教以空心日服建蓮子遂生子李副憲奉倩有子十一人云亦

服此方有驗

洪北江絕句云大九州藏小九州大瀛海外水仍流
九州各有開天聖迭柱乾坤到盡頭張南山云孔子
開聖教老聃開道教釋迦開佛教麻哈默特開回教

耶穌開天主教彼亦自謂開天聖也

天主教始於東漢耶穌教始於

前明已詳
卷三此誤

趙甌北觀西洋樂器詩後段云奇哉創物智乃出自
蠻貊緬維華夏初神聖幾更易鸞鷟肇律呂秬黍度

寸尺嶧谷截綠筠泗濱採浮石元聲始審定萬古仰
翔獲迢迢裨海外何由來取則伶倫與后夔姓名且
未識音豈師曠傳譜非制氏得始知天地大到處有
開闢域中多墟拘儒外有物格此與洪詩意相似

四裔編年表四卷崇明李鳳苞編吳縣嚴良勳美國
林樂知同譯以中國少昊四十年壬子起至 本朝
咸豐十一年辛酉止爲之綱凡地球各國之有年可
考者分隸于下以西歷紀之漢平帝元始元年辛酉

敷王始生西歷以此年爲元年至咸豐辛酉爲一千八百六十一年其漢哀帝元壽二年庚申爲西歷前一年又逆溯而上至少昊壬子爲西歷前二千三百四十九年

外洋地廣人稀常招華人往彼國墾田開礦等事奸徒因而掠販粵俗所謂賣猪仔也官府嚴禁與洋人議立條約專設委員稽查之此風終難淨絕徐次周別駕有論洋人招工書云招工一事愚以爲與其禁

之而防不勝防不如弛之而因以爲利粵中多盜每
年省會梟戮無慮二千人而郡縣誅鋤者尙不在內
間擬爲從而發籍徵禁保束尤眾實則皆堅不認供
之點盜耳今使立一法令招工之事由官經理卽以
此項人犯賒其一死官爲刺字販與外洋以所得值
給該犯爲出洋貲本旣不失國家好生之心又可
仿屏禦魑魅之意於中朝政體無損也而此等慄
悍之徒卽爲凌虐至斃本屬罪有應得倘能本桀驁

之性積怨抑之氣在彼中攘臂作難亦足耗損其國
萬一我朝欲勤遠略並可引以爲援以作嚮導內
應苟有梟人崛起克自樹立得其土地民人則因而
封之如秦漢趙佗漢周錢鏐故事彼挾中國以爲重
亦死生不敢背負從此勝算在吾彼勞我逸因號召
之便乘機釁之利不及百年固不難元昊稱臣樓煩
繫頸矣